

Brama da pitschnezza

Il senn d'ina votaziun populara

DA GUIU SOBIELA-CAANITZ

■ **Tgi stat sin nossas bancnotas da tschient? Quai sa segir tgi che legia: Sin nossas bancnotas da tschient stat noss artist grischun Alberto Giacometti (1901–1966). E tgi stat sin quellas da duatschient?** Qua ston ins ponderar in amen. In auter Grischun n'è quai betg, ina femna, sco sin la verda da tschinquanta, era betg, mabain in um cun barbis e cun in text scrit a maun per franzos, pia in Romand: Il scriptur vadais Charles-Ferdinand Ramuz (1878–1947).

Lez enconusch'ins perfin a Wallisellen/ZH. En quel vitg hai maridà il 1971, e l'uffiziant da stadi civil, en sia allocuziun solenna per tudestg da standard, ha cità e commentà in text da Ramuz.

«Besoin de grandeur» («brama da grondezza»): Uschia ha num ina da las

ovras las pli famusas da Ramuz, e quai s'affa per ina vischnanca sco Wallisellen che ha survegnì 2008 il label federal «Citad d'energia».

Il schurnalist Pascal Holenweg, commember dal parlament communal genevrin, ha cità e commentà in text da Ramuz davart pajais pitschens ch'ignoreschan la grondezza:

«I s'isoleschan, vivan per sasezs, e la finala na poni betg pli sa cumparegliar sezs.

La fin finala confundan els conformissem cun urden, passivitat cun tschertezza, resignaziun cun fidanza en sasez (...).

Ramuz deplorava ch'ins senta uschè pouca brama da grondezza.

Anzi, sunter la votaziun dals 9 da favrer 2014 davart l'iniziativa xenofoba da la pps, (...) sent'ins ina ferma brama da pitschnezza, ina brama da star a chassa, tar sasez, cun sasez, en la stiva chau-

da (...). Ils 9 da favrer ha la Svizra, la vaira, quella segund Blocher, senza Romandia, senza citads, senza sanestra politica, quella Svizra ha sa snegada sezza, sa declerada memia flailva, memia pitschna, memia paupra culturalmain per resister a la circulaziun libra da simbols e da persunas (...).

La votaziun po almain stgatschar la fimanza dals mitus istorics e discurs patriotics che cumprovan (...) l'extrema 'brama da pitschnezza' da la 'vaira Svizra'.

I spetga in'otra iniziativa, 'Ecopop'; lezza n'exprima nagut auter che la reducziun da la Svizra sin sasezza.»

**Funtauna: Pascal Holenweg, L'impoligraphe*.
Besoin de petitesse?**

En: «Le Courrier», 18 da favrer 2014, Geneva, p. 2.

* «Impoli» munta «grop», «maltschec», «senza creanza», «senza maniera».